

PKR dakwa hutan simpan Negeri Sembilan ditarah secara haram
Malaysian Insider
23 Oktober, 2012
Oleh Md Izwan

KUALA LUMPUR, 23 Okt — Umno di Negeri Sembilan telah menghapuskan hutan simpan seluas 8,616 hektar secara haram kerana tidak melanggar undang-undang yang diperuntukan.

Dalam satu kenyataan kepada media hari ini, pengambilalihan tersebut menurut PKR telah dilakukan melalui pewartaan membatalkan status hutan simpan kekal yang diluluskan oleh Majlis Mesyuarat Kerajaan Negeri yang dipengeruskan oleh menteri besar (MB) Negeri Sembilan, Datuk Seri Mohamad Hassan.

Siasatan oleh pengarah strategi PKR Rafizi Ramli dan timbalan setiausaha agong PKR, T Kumar mendapati Negeri Sembilan sebagai negeri di Semenanjung Malaysia yang paling banyak menghapuskan hutan simpan bagi tujuan pembalakan.

Selain itu, dua pemimpin PKR tersebut juga membongkar aktiviti kerajaan Umno di Negeri Sembilan yang menjalankan pembalakan di hutan simpan tetap Jeram Padang Selatan seluas 487.3 hektar yang diwartakan sebagai hutan simpan tetap sejak 30 Ogos 1918.

PKR mendedahkan kawasan di Jeram Padang Selatan telah dikategorikan sebagai Zon Kawasan Sensitif Alam Sekitar (KSAS) Tinggi dan perlu dipelihara sepenuhnya dan tidak dibenarkan untuk sebarang pembangunan.

Mukasurat 5-77[6] Rancangan Tempatan Daerah Jempol 2002 — 2015 secara jelas menunjukkan bahawa Hutan Simpan Tetap Jeram Padang Selatan adalah berkategori KSAS Tahap 1 dan tidak boleh dibangunkan.

“Oleh yang demikian, pewartaan membatalkan status hutan simpan tetap bertarikh 11 Mac 2004 adalah tidak sah disisi undang-undang kerana bertentangan dengan rancangan tempatan sedia ada, lalu melanggar Seksyen 18(1) Akta Perancangan Bandar dan Desa,” tulis PKR.

PKR juga mendakwa dua MB yang mentadbir Negri Sembilan iaitu Tan Sri Isa Samad dan Mohamad bukan sahaja tidak menghiraukan undang-undang malahan membenarkan penerokaan sehingga menyebabkan kini kawasan tersebut kini menjadi kawasan penanaman kelapa sawit.

Dalam kenyataan tersebut juga menyatakan jumlah hutan simpan kekal yang telah dibatalkan meningkat secara sejak 2005 daripada 162, 075 hektar menurun kepada 153, 459 hektar pada tahun 2011.

Hakcipta © 2012 The Malaysian Insider
Source:

<http://www.themalaysianinsider.com/bahasa/article/pkr-dakwa-hutan-simpan-negeri-sembilan-ditarah-secara-haram/>